



## ALERTA

### Belun Nian Sistema Atensaun no Responde Sedu (AtReS)

## INSIDENTE VIOLÉNSIA ELEITORÁL 41 AKONSETE DURANTE PERIODU ELEISAUN PREZIDENSIAL, MASKI LADUUN SERIU Dili, 6 Abril 2017

Bazeia ba rezultadu monitorizasaun Belun liu husi Sistema Atensaun no Responde Sedu (AtReS)<sup>1</sup> ba insidente violénsia eleitorál ne'ebé akontese **antes, durante no depois** votasaun iha eleisaun prezidensial ne'ebé realiza ona iha loron 20 Marsu 2017 rejista insidente 41. Husi insidente 41 ne'e, insidente 6 de'it mak uza forsa fiziku ho maneira asalta malu no tuda malu, no restu envolve violénsia verbal hanesan istori malu, haksasuk malu no hakilar malu.

Fatin akontese insidente violénsia eleitorál hirak ne'e mak, iha Munisipiu Dili akontese insidente 13, iha Munisipiu Likisá insidente 8, iha Munisipiu Ainaru, Covalima no Manufahi ida-idak insidente 3, iha Munisipiu Bobonaru insidente 2, iha Munisipiu Aileu, Ermera, Lautein, Manatuto no Rejiaun Administrativa Espesial Oekusi Ambeno (RAEOA) ida-idak akontese insidente 1.

Dadus hatudu katak, maioria insidente hirak ne'e akontese tanba:

- militante halo provokasaun ba malu iha tempu kampaña no prosesu kontajen de votu, ne'ebé akontese insidente violénsia 19 (ezemplu: ho hatún malu, hakilar malu to'o balun tuda malu no baku malu),
- votante no ofisial iha sentru votasaun seidak komprende ho di'ak regra no prosesu eleisaun, akontese insidente 8, (ezemplu: ofisial sentru votasaun halo impedimentu ba membru F-FDTL (hatais sivil) ne'ebé mai tuir votasaun,
- votante balun hatene regra eleisaun maibé lakohi halo tuir duni regra eleisaun nian, akontese insidente 4 (ezemplu: hasai foto iha kabina laran ba boletin da votu ne'ebé tu'u ona) no mai vota ho uza atributu partidu nian),
- deskonfia irregularidade, akontese dala 4, (ezemplu: hanesan boletin da votu iha riska no vistu ona antes votante tu'u, troka dala 3 tuituir malu maibé hanesan de'it, desizaun votu nulu deskonfia diskriminasaun),
- liña forma naruk liu, lakon pasiénsia hamosu hirus malu, akontese insidente 4,
- votante la hatene tempu votasaun no fatin votasaun, akontese dala 2, Ezemplu: votante forma tiha ona liña naruk no too tuku 03.00 lokraik tenke para entaun hamosu haksasuk malu entre votante ho ofisiais sentru votasaun.

### Rekomendasaun no Asaun Imediatu Antes Eleisaun Parlamentár:

Eleisaun Parlamentár ne'ebé kompete maizumenus husi 31 partidu polítiku, sei hamosu poténsia konflitu, tanba nee, Belun rekomena:

- Governu liu husi STAE hodi hadi'ak sistema resenseamentu eleitorál ho sistema mobile, tama-sai suku hodi garante partisipasaun comunidade iha eleisaun no comunidade ne'ebé idade tinan 17 ba

<sup>1</sup> Sistema Atensaun no Responde Sedu (AtReS) kobre iha Postu Administrativu 43 (husi total 65), iha Suku 275 (husi total 442) iha Munisipiu 12 no Rejiaun Autonomia Espesial Oekusi.



- leten hodi tarata kartaun eleitorál ho los kuandu hakarak tuir votasaun, la'ós too iha tempu votasaun mak soe kulpa nee ba estadu;
2. Governu liu husi STAE hodi haree fila fali número sentru votasaun tanba insidente balun mosu tanba votante forma ona liña naruk maibé too ikus labele vota tanba oras hotu ona;
  3. Governu liu husi STAE ho nia parseiru dezenvolvimentu, sociedade sivil, ONG sira tenke investe duni ba halo sosializasaun prosesu eleisaun hodi redús insidente ne'ebé mosu tanba votante la komprende prosesu eleisaun too ikus hamosu insidente violénsia iha sentru votasaun;
  4. Governu liu husi Komisaun Nasionál Eleisaun (CNE) ho nia parseiru dezenvolvimentu hodi investe no tau prioridade ba edukasaun sivilika ba comunidade votante sira hodi kompriende ho di'ak sistema demokrasia iha sistema eleisaun hodi redús insidente mosu tanba provokasaun ba malu;
  5. Lideransa partidu sira no ekipa susesu sira katak kapasidade atu maneja militante sai sasukat ida atu bele kaer ukun tanba insidente barak mosu tanba militante la kontrola an;
  6. Lider polítiku sira atu iha tempu kampaña ko'alia programa no vizaun, misaun partidu nia la'ós halo defamasaun ba malu hodi provoka insidente violénsia entre militante;
  7. Husu ba CNE atu asegura partisipasaun no direitu sidadaun nian iha prosesu demokrátiku, inklui halo observasaun forte liután iha eleisaun parlamentár mai, partikulármente iha area rural;
  8. PNLT mantén nafatin lei no orden iha kampaña no prosesu eleisaun hodi garante estabilidade no liberdade iha eleisaun;
  9. Husu ba populasaun Timor-Leste atu pasiénsia no simu rezultadu eleisaun, no karik akontese irregularidade ruma bele apresenta ba parte kompetente hanesan CNE.

Belun sei publika relatóriu monitorizasaun ho dados, análise no rekomendasaun ba eleisaun Parlamentár kompleta fulan nee.

Atu hetan informasaun liu tan favor vizita Belun nia website foun kona-ba dados insidente violénsia iha [www.atres.belun.tl](http://www.atres.belun.tl). Bele mós kontaktu ba Jestor Programa AtReS Señora Marilia O. da Costa iha [bylah.belun@gmail.com](mailto:bylah.belun@gmail.com).

*Publikasaun ida ne'e konsege hala'o tanba hetan apoiu jenerozu husi Povu Amerikanu liu husi Ajénsia Estados Unidos ba Dezenvolvimentu Internasionál (USAID), Uniaun Europeia, UNDP, Governu RDTL, Estados Unidos Departamentu de Estadu no Organizaun Internasionál ba Migrasaun (IOM) liu husi Award No. S-SJTIP-15-GR-1006). Opiniaun no kontextu husi konteúdu ne'e rasik responsabiliza husi NGO Belun no la nesesáriamente refleta vizaun husi USAID, Governu Estados Unidos, Estados Unidos Departamentu de Estadu, IOM, Uniaun Europeia, UNDP, UNDA no Governu RDTL. Atu hetan informasaun barak liu tan kona-ba programa AtReS ka atu hare publikasaun seluk, favor vizita: <http://www.belun.tl>*